

I - ARABAKO BATZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

Arabako Foru Aldundia

KULTURA ETA KIROL SAILA

120/2020 Foru Agindua, ekainaren 18koa. Arabako Gimnastika Federazioaren estatutuen moldaketa onartzea

Euskadiko kirol federazioen gaineko urtarrilaren 31ko 16/2006 Dekretuak dio, lehen xedapen iragankorrean, kirol federazioek egokitu egin behar dituztela euren estatutuak Dekretu horrek xedatutakora.

Euskadiko kirol federazioen gaineko urtarrilaren 31ko 16/2006 Dekretuaren 65.2 artikulua dio Arabako kirol federazioen estatutuak Arabako Foru Aldundiko dagokion organoan aurkeztuko direla, onartzeko.

Arabako Foru Aldundiko Kultura eta Kirol Sailak du eskumena kirol arloan.

2020ko otsailaren 5eko 2329 zenbakiko idazkian, Arabako Gimnastika Federazioak eskatu zuen administrazioak onetsi zitzala 2019ko abenduaren 26ko ohiko batzar orokorrak onartutako bere estatutuen 16 eta 17 artikuluen moldaketak.

Horren ondorioz, dagozkidan eskumenez baliatuz, hauxe

XEDATZEN DUT

Lehenengoa. Onartzea Arabako Gimnastika Federazioaren estatutuen 16 eta 17 artikuluen moldaketa, zeinak foru agindu honen eranskin txertatu diren.

Bigarrena. Ebazpen hau eta bere eranskina ALHAOn argitaratzea.

Hirugarrena. Foru agindu honen bidez onartutako Arabako Gimnastika Federazioaren estatutuen 16 eta 17 artikuluen moldaketa onarpenaren kopia bidaltzea Eusko Jaurlaritzako Kirol Erakundearen Erregistrora.

Laugarrena. Ebazpen honek administrazio bidea agortzen du. Dena dela, urriaren 1eko 39/2015 Legeak, administrazio publikoen administrazio prozedura erkidearenak, 123. artikuluan xedatzen duenaren arabera, aukerako berraztertze errekurtsoa jar dakioke Kultura eta Kirol Saileko foru diputatuari, hilabeteko epean, egintza hau jakinarazi eta hurrengo egunetik aurrera, edota zuzenean administrazioarekiko auzien jurisdikzioan aurka egin dakioke bi hilabeteko epean, egintza hau jakinarazi eta hurrengo egunetik aurrera, administrazioarekiko auzietarako epaitegietan, uztailearen 13ko 29/1998 Legeak, administrazioarekiko auzien jurisdikzioa arautzen duenak, 46.1 artikuluan ezarritakoaren arabera.

Vitoria-Gasteiz, 2020ko ekainaren 18a

Kultura eta Kirol Saileko foru diputatua

ANA M. DEL VAL SANCHO

Kirol zuzendaria

PABLO DE ORAÁ OLEAGA

ERANSKINA

ARABAKO GIMNASIAFEDERAZIOAREN ESTATUTUAK

I. TITULUA
XEDAPEN OROKORRAK**1. artikulua**

Arabako Gimnasia Federazioa irabazteko xederik gabeko entitatea da. Nortasun juridikoa eta jarduteko ahalmena du, eta kirolariak, teknikariak, epaileak, kirol klubak eta elkarteak eta beste entitate batzuk biltzen ditu bere baitan, Arabako Lurralde Historikoan gimnasia modalitate desberdinak praktikatzeko, sustatzeko eta antolatzeko.

Arabako Gimnasia Federazioak ondorengo diziiplina hauek hartuko ditu beregan:

- a) Gimnasia orokorra.
- b) Gimnasia akrobatikoa.
- c) Gimnasia artistikoa.
- d) Gimnasia erritmikoa.
- e) Ohol jauziak.
- f) Kirol aerobica.

2. artikulua

Arabako Gimnasia Federazioak lege arau hauek ditu gidari: 1998ko ekainaren 11ko 14/1998 Legea, Euskadiko kirolarena; 2006ko urtarrilaren 31ko 16/2006 Dekretua, Euskadiko kirol federazioena; Legea garatzen duten gainerako xedapenak; estatutu hauek; berariaz prestatutako araudiak; eta bere organoek baliotasunez hartutako erabakiak.

3. artikulua

Helbide honetan du egoitza Arabako Gimnasia Federazioak:

Zerkabarren, 5-behea (Kirol Etxea).

01001 Gasteiz (Araba).

4. artikulua

Arabako Gimnasia Federazioak Arabako Lurralde Historikoko gimnasiako kirol jarduera eta lehiaketa ofizialak eta, kasuan kasu, modalitate horretan antolatzen edo zehazten diren diziplinak sustatu, kalifikatu, baimendu, zuzendu eta antolatzen ditu, Euskadiko Gimnasia Federazioari dagozkion eskumenen nahiz Arabatik kanpo gauzatu ditzakeen jardueren kaltetan izan gabe.

5. artikulua

Arabako Gimnasia Federazioa Euskadiko Gimnasia Federazioko kide da.

Arabako Gimnasia Federazioak bere modalitateari dagokion Arabako kirol federatua ordezkatzeko du Euskal Autonomia Erkidegoan.

6. artikulua

Bere helburuak lortzeko, eginkizun hauek beteko ditu Federazioak:

- a) Kirol jarduera federatua antolatzea Arabako lurralde eremuan.
- b) Kirol modalitateko eta bertan txertatuta dauden diziplinak lehiaketa ofizialak eta jarduerak antolatzea Araban.

c) Parte hartzeko eta lehiatzeko bere arauak ezartzea, nahiz eta, hala dagokionean, lurralde eremu zabalagoko federazioek emandako arauak ere aplikatuko diren.

d) Gimnasia modalitateko ordezkaria izatea Euskal Autonomia Erkidegoan, eta bere estamentu guztiek esparru horretako lehiaketa guztietan parte hartzeko bideak jartzea.

e) Bere modalitateko federazio lizentziak izapidetzea, gero Euskadiko Gimnasia Federazioak eman ditzan, azken honek ezarritako betebeharrak eta prozedurei jarraiki.

f) Bere jarduera aurrera eramaterakoan sortzen diren kirol gatazken berri jakitea eta haiek ebaztea, organo judizialen eta arbitralen eskumenaren kaltetan izan gabe.

g) Bere arauak betearaztea eta diziplinako ahalmena haien arabera erabiltzea.

h) Euskadiko Gimnasia Federazioarekin batera lan egitea debekatuta dauden botika gaiak eta multzoak eta kirolean arau kanpokoak diren metodoak erabil ez daitezen aurre neurriak hartzen, erabilera horiek ikuskatzen eta zigortzen, horretarako xedatzen den araudiaren arabera.

i) Gimnasia kirol modalitateko teknikariak eta epaileak prestatzen laguntzea, horretarako xedatzen den araudiaren arabera.

j) Bere diru baliabideak zertarako erabili eta nola banatu erabakitzea; bere jarduera aurrera eramateko beste erakunde batzuek eskualdatzen dizkieten baliabideak kudeatzea, eta bere baliabide guztiak zuzen erabiltzen direla zaintzea.

k) Kide dituen kirol klub eta elkarteei ematen dizkien dirulaguntzak esleitzea eta kontrolatzea.

l) EAEko administrazioekin batera elkarlanean aritzea kirola bultzatzeko bere helburuak betetzerakoan, eta bereziki, 14/1998 Legeak federazioei zuzenean ematen dizkien lankidetzak eta aholkularitza eginkizunetan.

m) Bere estatutuak eta araudiak prestatzea.

n) Dagokion lurralde eremuan eta bere kirol modalitatean emakumeen eta gizonen arteko berdintasuna sustatzea eta, ahal den neurrian, bermatzea.

ñ) Eta, oro har, bere kirol modalitatean aritzea bultzatzeko eta hobetzeko egokia den guztia xedatzea.

7. artikulua

Arabako Gimnasia Federazioak Euskadiko Gimnasia Federazioarekin eta, hala dagokionean, bere modalitateko beste lurralde federazioekin koordinatuta beteko ditu bere eginkizunak.

Arabako Gimnasia Federazioak Arabako Foru Aldundiarekin lankidetzan beteko ditu bere eginkizunak eta lankidetzak hitzarmenak sinatu ahal izango dira bien artean, helburuak, kirol programak, aurrekontuak eta eskuordetutako funtzio publikoekin zerikusi zuzena duten gainetarako alderdiak zehazteko xedez. Hitzarmen horien izaera juridiko-administratiboa izango da. Era berean, Arabako Gimnasia Federazioak kontratu programak sinatu ahal izango ditu Arabako Foru Aldundiarekin; horietan, gutxienez, programak finantzatzeko aurreikuspenak, lortu beharreko helburu zehatzak edo kuantifikagarriak eta helburu horiek ebaluatze eta auditatzeko mekanismoak adierazi beharko dira.

8. artikulua

Arabako Gimnasia Federazioaren barruan ez da utziko inori bereizkeriarik egiten arrazagatik, sexuagatik, erlijioagatik, iritzia eta sinesmenengatik, edota beste edozein egoera pertsonal nahiz sozialengatik.

II. TITULUA

FEDERAZIOKO KIDE EGITEA. LIZENTZIAK

9. artikulua

1. Federazio lizentzia agiri pertsonala eta besterenezina da; bere titularrari, pertsona fisikoa edo juridikoa izan, Arabako Gimnasia Federazioko kide izaera ematen dio, eta bere lehiaketa ofizialetan parte hartzeko gaitzen du, betiere lehiaketa bakoitzean diren arauak jarraituz.

2. Federazio lizentzia bakarra izango da EAE osoan, eta, horren bidez, titularra kirol modalitate bateko bai Arabako Gimnasia Federazioari bai Euskadiko Federazioari atxikita egongo da.

3. Aldi berean bi federazioetako kide egiten da bat dagokion lizentzia eskuratzean.

4. Arabako Gimnasia Federazioak, Euskadiko Federazioarekin ados jarrita, aisialdiko edo zerbitzuetako txartel bat sortu ahal izango du, ofiziala izango ez dena eta borondatezko harpidetza izango duena. Txartel horrek ez du titularra dagokion federazioko kide egingo, eta ofizialak ez diren kirol jarduera batzuetan parte hartzea edo zerbitzu jakin batzuk jasotzea baino ez du ahalbidetuko.

10. artikulua

1. Arabako Gimnasia Federazioa da bere kirol modalitateko federazio lizentziak izapidetzeko eskumena duen erakunde bakarra.

2. Arabako Gimnasia Federazioak borondatezko kuota gehigarria jaso ahal izango du federatuengandik, federazioaren zerbitzu eta jarduera jakin batzuk finantzatzeko.

3. Arabako Gimnasia Federazioak lizentzia bakoitzaren zenbateko garbia Euskadiko Federazioari emango dio, eta likidazio hori Euskadiko Federazioaren Batzar Orokorra onesten dituen terminoetan, eta urtarrilaren 31ko 16/2006 Dekretuaren 24.5 artikuluan xedatutakoaren arabera egingo du.

11. artikulua

Lizentziek Euskadiko Federazioaren Batzar Nagusiak onartutako formatua eta edukia izango dituzte, eta lizentziotan, halaber, Euskal Autonomia Erkidegoko bi hizkuntza ofizialak erabili beharko dira. Arabako Gimnasia Federazioak federazio lizentzien eskakizunen eta ondorioen berri emango die federatu nahi dutenei, eta federazioko kide egiteko beharrezkoak diren agiriak eta datuak jasoko ditu.

12. artikulua

Federazio lizentziek urtebeteko iraupena izango dute, urte naturalarekin bat etorriz, Euskadiko Gimnasia Federazioak bestela xedatzen duenean salbu.

III. TITULUA

GOBERNU, ADMINISTRAZIO ETA ORDEZKARITZAKO ORGANOAK

13. artikulua

Arabako Gimnasia Federazioan gobernu, administrazio eta ordezkaritzako organo hauek egongo dira:

- a) Gobernu organo bat, Batzar Nagusia izeneko.
- b) Administrazio organo kolegiatu bat, Zuzendaritza Batzordea izeneko.
- c) Ordezkaritza organo bat, zeinaren titularra Federazioko lehendakaria izango baita.

I. KAPITULUA
BATZAR NAGUSIA**14. artikulua**

Batzar Nagusia Federazioaren gobernu organo gorena da, eta bere gain izango ditu egin-kizun hauek, gutxienez:

- a) Lehendakaria aukeratzea.
- b) Federazioaren kontuak eta aurrekontuak onartzea.
- c) Estatutuak eta estatutuen aldaketak onestea.
- d) Zentsura mozioa onestea.
- e) Lehiaketa egutegi ofiziala onartzea.
- f) Federazioaren jardun plana onartzea.
- g) Federazioaren araudiak eta horien aldaketak onartzea.
- h) Ondasun higiezinak erabiltzea, besterentzea eta zergapetzea, maileguak hitzartzea eta zorraren edo ondarearen zati alikuotaren tituluak jaulkitzea, estatutu hauetan ezarritakoaren arabera.
- i) Federazioa desagitea erabakitzea.
- j) Duten garrantzia dela-eta Batzar Nagusiaren onespena behar duten beste erabaki guztiak hartzea.
- k) Diziplina epailea kargugabetzea.

15. artikulua

1. Arabako Gimnasia Federazioaren Batzar Nagusia lau urtez behin hautatuko da bozketa libre, zuzeneko, berdin eta isilpekoaren bidez.

2. Hauteskundeak, betiere, 16/2006 Dekretuaren 75. artikuluan ezarritakoaren arabera egingo dira.

3. Salbuespenez, eta Arabako Foru Aldundiaren berariazko administrazio baimena eskuratu ondoren, hauteskunde prozesua atzeratu edo aurreratu egin ahal izango da, hasteko aurreikusitako datetan egitea ezinezkoa gertatzen denean.

16. artikulua

16/2006 Dekretuaren 77. artikuluko 3. puntuaren arabera, eta Euskadiko Gimnasia Federazioak onartzen duenez federazio lizentziak ematea kirol klub eta elkarteetan sartu gabe dauden kirolariei, estamentuen ordezkaritza honelakoa izango da Batzar Nagusian:

1. Erroldan sartutako kirolari gehienak kirol klub eta elkarteetan bidez sartuta badaude:

Batzar Nagusia osatuko dute kirol klub eta elkarteetako estamentuen ordezkariak, kirolariak, teknikariak eta epaileak, proportzio hauetan:

- a) Atxikitako kirol klub eta elkarteetako estamentuen ordezkaritza: batzarkide guztien ehuneko 70.
- b) Kirolarien ordezkaritza: batzarkide guztien ehuneko 15.
- c) Teknikarien eta epaileen ordezkaritza: batzarkide guztien ehuneko 15. Teknikari eta epaileei dagokien ehuneko teknikari eta epaileen artean banatzeko, estamentu horietako bakoitzak erroldan sartuta duen lizentzia kopuruaren proportzioan egingo da kalkulua.

2. Erroldan sartutako kirolari gehienak ez badaude kirol klub eta elkarteetan bidez sartuta:

Batzar Nagusia osatuko dute kirol klub eta elkarteetako estamentuen ordezkariak, kirolariak, teknikariak eta epaileak, proportzio hauetan:

a) Atxikitako kirol klub eta elkarteetako estamentuen ordezkariak: batzarkide guztien ehuneko 20.

b) Kirolarien ordezkariak: batzarkide guztien ehuneko 60.

c) Teknikarien eta epaileen ordezkariak: batzarkide guztien ehuneko 20. Teknikari eta epaileei dagokien ehunekoa teknikari eta epaileen artean banatzeko, estamentu horietako bakoitzak erroldan sartuta duen lizentzia kopuruaren proportzioan egingo da kalkulua.

3. Batzar Nagusiko kideen kopuru zehatza hauteskunde ororen aurretik zehaztuko du Hauteskunde Batzordeak, hauteskundeetarako dagoen errolda kontuan hartuta eta, hala dagokionean, Hauteskunde Araudiak ezarritako irizpideen arabera.

4. Batzarrean gehienez 20 kide izan daitezke.

17. artikulua

1. Kirol klub eta elkarten estamentuak Batzar Nagusian edukiko dituen ordezkariak klub eta elkarten ordezkariak hautatuko dituzte beren kideen artean, baina baldintza hauek beteta: batetik, EAEko Kirol Erakundearen Erroldan izen emanda egotea eta Arabako Gimnasia Federazioko kide izatea; bestetik, gutxienez lizentzia bat izatea izapidetuta, hauteskundeak egiten diren denboraldian aktiboan egon diren eta aurreko denboraldian lizentzia eduki duten kirolarienak eta, gainera, kirolari horiek hauteskundeak egiten diren denboraldian kirol jarduera nabarmena eduki dutenak eta aurreko denboraldian eduki dutenak izan behar dute. Kirol jarduera nabarmena zer den zehazteko irizpideak arauz ezarriko dira.

Kirol klub edo talde batek kirol jarduera nabarmena duela joko da baldin eta hauteskundeak egiten diren urtean Arabako Gimnastika Federazioaren egutegi ofizialeko gutxienez jarduera batean parte hartzen badu, eta, horrez gain, hauteskundeak egin aurreko urtean Arabako Gimnastika Federazioaren egutegi ofizialeko gutxienez jarduera batean ere parte hartzen badu.

18. artikulua

1. Kirolarien estamentuak Batzar Nagusian edukiko dituen ordezkariak hemezortzi urtetik gorako kirolarien artean hautatuko dira, betiere hauteskundeak egiten diren urtean eta aurrekoan lizentzia indarrean izan dutenen artean. Ordezkaritza hori hamasei urtetik gora izanik lehen aipatutako baldintzak betetzen dituzten kirolariak hautatuko dute.

2. Teknikari eta epaileen estamentuek Batzar Nagusian edukiko dituzten ordezkariak hauteskundeak egiten diren urtean eta aurreko urtean lizentzia –lizentzia edozein mailatakoa izanik ere– indarrean izan dutenek hautatuko dituzte, beren artean.

3. Hautaturik dauden aldian Batzar Nagusiko kideen artean hutsuneren bat gertatuko balitz, Batzar Nagusiko azken hauteskundeetako estamentu bakoitzeko ordezkoren zerrendan lehena zegoen pertsonak edo erakundeak beteko luke hura, Hauteskunde Araudian helburu horrekin ezarriko den jardunbidearen arabera.

19. artikulua

1. Batzar Nagusiak ohiko eta aparteko batzarraldiak egingo ditu.

2. Urtean gutxienez ohiko batzarraldi bat egingo da, urteko lehenengo sei hilabeteen barruan, kontuen egoera eta aurrekontua onartzeko. Egutegi ofiziala denboraldia hasi aurretik onartu beharko da.

3. Bere eskumenekoak diren gainerako gaiak ere ohiko batzarraldian jorratuko dira, hurrengo paragrafoan aurreikusitakoak izan ezik.

4. Batzar Nagusia aparteko batzarraldian bilduko da ondorengo gai hauetarako:

- a) Hauteskundeak egitea.
- b) Zentsura mozioa.
- c) Estatutuak onartzea edo aldatzea.
- d) Federazioa desegitea.
- e) Araudiak onartzea edo aldatzea.

20. artikulua

1. Ohiko nahiz aparteko Batzar Nagusietarako deialdia egitea Federazioko lehendakariari dagokio ofizioz, Zuzendaritza Batzordeak edo gutxienez Batzar Nagusiko kideen ehuneko 5ak hala eskatuta. Hori egiterik ez balego, edota lehendakariak Batzarrerako deialdia egiteko betebeharra beteko ez balu, Zuzendaritza Batzordeak, gehiengo soilez hartutako erabakiaren bidez, edo Batzarreko kideen ehuneko 5eko ordezkaritza duen talde batek egin ahal izango luke deialdia.

2. Lehendakariak gehienez 15 egun naturaleko epean egin beharko du Batzarrerako deialdia, horretarako eskaera egiten denetik kontatzen hasita.

21. artikulua

Ohiko nahiz aparteko Batzar Nagusirako deialdiaren eta gai zerrendaren berri idatziz emango zaie Batzarreko kideei, 15 egun aurretik gutxienez. Idatzizko jakinarazpena baliozkoa izango da faxez, posta elektronikoz edo kasu orotan erregistratzea edo gordetzea ahalbidetzen duen antzeko beste bitarteko baten bidez egiten denean ere.

22. artikulua

1. Batzarreko kideek ahalmena dute lehendakariari eskatzeko interesgarritzat jotzen dituzten gaiak gai zerrendan sar ditzan, baldintza hauek betez gero: eskaera Batzarreko kideen gutxienez ehuneko 5ek proposatuta egin beharko da, sartu beharreko gaia Federazioaren interes orokorreakoa baldin bada; edota estamentu bateko kideen ehuneko 5ek proposatuta, sartu beharreko gaiak lehentasunezko interesa baldin badu estamentu horrentzat. Nolanahi ere, eskaera Batzar eguna baino bost egun natural lehenago egin beharko da, gutxienez.

2. Proposatutakoa gai zerrendan sartzeko eskaerari ezezkoa emanez gero, horren berri eman beharko zaio eskatzaileari, eta ezezkoa emateko arrazoiak azaldu beharko zaizkio.

23. artikulua

1. Batzar Nagusiak baliozko eraketa izango du lehen deialdian, baldin eta kideen erdiak eta bat gehiago agertzen badira. Bigarren deialdian eraketa baliozkoa izango da, agertzen diren kideen kopuruari erreparatu gabe.

2. Zuzendaritza Batzordeko kide izanik Batzar Nagusiko kide ez direnak Batzarrerara agertu ahal izango dira, hitzarekin baina botorik gabe. Kide horiek ez dira kontatuko quoruma zenbaterakoan.

24. artikulua

Botoak eskuordetzerik ez da onartuko Batzar Nagusiaren barruan.

II. KAPITULUA ZUZENDARITZA BATZORDEA

25. artikulua

Zuzendaritza Batzordea Federazioaren administrazio organoa da eta Federazioaren gaien administrazio eta ekonomia kudeaketaren eginkizunak betetzen ditu. Batzar Nagusiak emandako jarraibideen arabera bete behar ditu eginkizun horiek.

26. artikulua

1. Zuzendaritza Batzordea bakoitia izango den kide kopuruaz osatuko da, eta honela egongo da eratuta:

a) Lehendakari bat, aldi berean Federazioko lehendakari izango dena.

b) Lehendakariorde bat, lehendakariaren eginkizunak bereganatuko dituena hura aldi baterako kanpoan baldin bada, edota kargua uzten baldin badu.

c) Gutxienez kide bat.

Zuzendaritza Batzordeko kide bat diruzaina izango da, eta beste bat idazkaria.

2. Zuzendaritza Batzordeko kargu guztiak ohorezkoak dira, idazkariarena eta diruzainarena salbu, horiek ordaina jaso dezakete-eta, Batzar Nagusiak onartzen duen moduan eta kontuan hartuta 16/2006 Dekretuaren 114. eta 115. artikuluek diotena.

27. artikulua

1. Zuzendaritza Batzordeko kideak lehendakariak hautatuko ditu, kargua hartu eta hurrengo hogeita hamar eguneko epearen barruan.

2. Zuzendaritza Batzordeko kideek 16/2006 Dekretuan jasotako baldintzak bete beharko dituzte, eta bereziki 108. artikulua dioena.

28. artikulua

1. Zuzendaritza Batzordearen bileretarako deialdiak egitea Federazioko lehendakariaren gain dago edo, hori falta denean, lehendakariordearen gain, edo bestela, kideen ehuneko 25aren gain.

2. Deialdiari jorratu beharreko gaien zerrenda eta horien gaineko agiriak erantsiko zaizkio.

3. Bileraren berri idatziz emango zaie batzordekideei, bi egun lehenago gutxienez, non eta ez dagoen behar bezala arrazoitutako presa larria.

4. Edozein modutan, deirik egiten ez bada ere, bileraren eraketa baliozkoa dela ulertuko da, baldin eta kide guztiak agertzen badira eta denek aho batez hala erabakitzen badute.

5. Zuzendaritza Batzordeko kide guztiek berariaz hala onesten dutenean, Batzordea baliotasunez deitu eta egin dela ulertuko da, bere erabakiak posta elektronikoa, faxa edo Batzordeko kideen adierazpenak nahiz horien botoak jasotzea ahalbidetzen duen beste edozein bitarteko tekniko erabiliz hartzen badira. Kasu horretan, aktarekin batera esku hartzeen eta botoen agiriak gorde beharko dira.

29. artikulua

1. Zuzendaritza Batzordea baliotasunez eratuko da lehen deialdian kideen erdiak eta bat gehiago agertzen badira, eta bigarren deialdian gutxienez kideen ehuneko 25 agertzen badira, betiere Federazioko lehendakaria edo lehendakariordea bertan dela. Deialdia Batzordeko kideen ehuneko 25ek eskatuta egin denean, bileraren eraketa baliozkoa izango da kideen erdia eta bat gehiago agertzen badira.

2. Federazioko lehendakaria, edo hura ez badago, lehendakariordea, izango da Zuzendaritza Batzordearen buru, eta berak zuzendu eta koordinatuko du Batzordearen jarduna.

30. artikulua

1. Zuzendaritza Batzordeak bere agintaldia utziko du arrazoi hauetakoren bat baldin badago:

a) Lehendakariaren aurkako zentsura mozioa onestea.

b) Administratiboki edo judizialki aitortutako gaitasungabetzea.

c) Lehendakariak dimititzea.

d) Kideen erdiak baino gehiagok dimititzea edo haien heriotza, Lehendakariak jarri ez baditu dimititu duten edo hil diren kideen ordezkioak.

2. Zuzendaritza Batzordeko kideek ondorengo arrazoi hauetakoren batengatik utziko dute kargua:

a) Dimititzea.

b) Heriotza.

c) Lehendakariak kargua uztea.

d) Judizialki aitortutako gaitasungabetzea.

e) Batzordearen hiru bilera edo gehiagotara, jarraian edo tartekatuta, ez agertzea, kirol denboraldi berean, arrazoitutako kausa larririk gabe.

f) Lehendakariak kargua utzaraztea.

3. Lehendakariak, Zuzendaritza Batzordeko kide batek edo gehiagok kargua utziko balute, hil egingo balira edo gaitasungabetuko balira, beste pertsona batzuk izendatu ahal izango ditu hutsik geratu diren karguak betetzeko.

31. artikulua

Federazioko idazkariak bere gain edukiko ditu, gutxienez, eginkizun hauek:

a) Batzar Nagusiaren eta Federazioaren Zuzendaritza Batzordearen bileren aktak egitea.

b) Federazioaren liburuez eta gainerako agiriez arduratzea, kontabilitateko ez izan ezik.

c) Liburu horien edukiari buruz eman beharreko ziurtagiri guztiak ematea.

32. artikulua

Federazioko diruzainak bere gain edukiko ditu, gutxienez, eginkizun hauek:

a) Federazioaren kontuak eramatea eta ekonomia eragiketarako egitea.

b) Federazioaren kontabilitate liburuak zaintzea eta eramatea.

c) Prestatu beharreko kontabilitate agiri guztiak prestatzea, bereziki urteko aurrekontuaren zirriborroa eta ekitaldi bakoitzeko kontuak, gero Batzar Nagusiak aztertu eta onar ditzan.

III. KAPITULUA LEHENDAKARIA

33. artikulua

Federazioko lehendakariak beregan dauka Federazioaren legezko ordezkaritza. Berak gauzatzen ditu Batzar Nagusiak eta Zuzendaritza Batzordeak hartutako erabakiak; eta buru eta zuzendari da bi organo horien bileretan.

34. artikulua

1. Federazioko lehendakaria Batzar Nagusiak hautatuko du, lau urtez behin, bere kideen artean, bozketa libre, zuzeneko, berdina eta isilpekoaren bidez, hartarako deitutako batzarraldian. Ez da botoetara joko hautagai bakarrik dagoenean.

2. Lehendakariak ondorengo arrazoi hauetakoren batengatik utziko du bere kargua:

a) Dimisioa.

b) Zentsura mozioa onestea, hain zuzen ere 16/2006 Dekretuaren 104. artikuluan eta estatutu hauen 35.enean aurreikusitakoa.

c) Administratiboki edo judizialki aitortutako gaitasungabetzea edo ezintasuna.

d) Heriotza.

3. Lehendakariak bere kargua uzten badu, beste bat hautatu beharko da. Horrelakoetan, Zuzendaritza Batzordeak jardunean jarraituko du, eta Hauteskunde Batzordea deituko du gehienez ere hilabeteko epean. Epe hori iragan eta deialdirik egiten ez bada, gutxienez Batzar Nagusiko kideen ehuneko 5en ordezkaritza duen edozein taldek deitu ahal izango du Hauteskunde Batzordea.

4. Lehendakariak 16/2006 Dekretuan jasotako baldintzak bete beharko ditu, eta bereziki 108. artikulua dioena.

35. artikulua

1. Batzar Nagusiak lehendakariaren erantzukizuna eska dezake, haren aurkako zentsura mozioa onetsiz. Horretarako, Batzar Nagusiko kideen gehiengo soilak egin beharko du mozioaren alde, horretarako deitutako batzaraldian eta betiere batzarkideen erdia gehi bat gutxienez bertan dela.

2. Zentsura mozioa onesten bada, lehendakariak eta Zuzendaritza Batzordeko kide guztiek karguak utzi beharko dituzte.

36. artikulua

Lehendakaria berrautatua izan daiteke, baina agintaldien denbora-muga jarraian hogeitagintaldikoa izango da. Jarraian izandako hogeitagintaldiak agortu ondoren ezingo da berriro lehendakari hautatu, gutxienez lau urte igaro arte.

IV. KAPITULUA

ORGANO GUZTIEI BURUZKO XEDAPENAK

37. artikulua

Estatutu hauetako 13. artikuluan ikusitako organoetako kide guztiek jardunean jarraituko dute beren ondorengoak karguez jabetu arte.

38. artikulua

1. Arabako Gimnasia Federazioaren organo kolegiatuen erabakiak bertaratutako kideen gehiengo soilaz hartuko dira, lege edo estatutuetako xedapenek gehiengo kualifikatuak aurreikusten dituztenetan izan ezik.

2. Kide guztiek berariaz onesten dutenean, Arabako Gimnasia Federazioaren organo kolegiatuek posta elektronikoko, fax, bideokonferentzia edo antzeko bitartekoen bidez hartu ahal izango dituzten erabakiak. Horrelakoetan, dagokion aktari faxen, posta elektronikoen eta dagozkien euskarrien agiriak erantsiko zaizkio.

39. artikulua

Arabako Gimnasia Federazioaren Batzar Nagusiko kide, Zuzendaritza Batzordeko kide edo lehendakari izateko betebeharrak honako hauek dira:

a) Adin nagusikoa izatea.

b) Auzotartasun administratiboa Federazioaren jardun eremuaren barruan izatea. Salbuespeneko egoeretan Batzar Nagusiak onar dezake baldintza hori bete beharrik ez izatea.

c) Karguak edo funtzioak betetzeko gaitasungabetzea dakarren diziplina zehapen irmorik ez izatea.

d) Epailearen epai irmoaren bidez kargu publikoan aritzeko gaitasungabetze zigorrik ez izatea.

e) Epailearen erabaki irmoaren bidez ezgaitzat jota ez egotea.

40. artikulua

1. Federazioaren organoek hartutako erabaki guztiak aktan idatziko ditu idazkariak, eta hor datu hauek ipini beharko ditu gutxienez: parte hartu dutenen izen-abizenak, bilera non eta noiz egin den, jorratu diren gai nagusiak, botazioaren modu-emaizak eta erabakien edukia.

2. Hartutako erabakiaren aurkako botoa eman dutenak, betiere horretarako arrazoia azal-duta, salbuetsita egongo dira organo kolegiatuek hartutako erabakien ondorioz etor litekeen erantzukizunetik.

41. artikulua

Arabako Gimnasia Federazioaren Zuzendaritza Batzordeak egoki irizten dituen adina batzorde eta antzeko organo sortu ahal izango ditu; bai Federazioaren kirol jarduerako arlo jakin bat garatzeko eta bai Federazioaren kolektibo edo estamentuen funtzionamen-durako.

42. artikulua

1. Arabako Gimnasia Federazioak dopajearen aurka aplikatzeko araudiak ezartzen dituen organoak izan beharko ditu.

2. Arabako Gimnasia Federazioak batzorde tekniko bat izango du Federazioaren kirol zuzen-daritza eta zuzendaritza teknikoa bere gain hartuko dituen.

43. artikulua

Arabako Gimnasia Federazioaren zuzendaritzako kideek ondorengo eskubide hauek izango dituzte:

a) Eusko Jaurlaritzak eta Arabako Foru Aldundiak federazioetako zuzendaritzetako kideei ematen dieten etengabeko prestakuntza jasotzea, bai eta euren funtzioak behar bezala betetzeko doako aholkularitza teknikoa ere.

b) Euren funtzioak gauzatzeak eragiten dizkieten gastuen diru ordainak jasotzea, Federazioak aurretik zehazturiko muga barruan.

c) Federazioaren bitartez, borondatezko jardueratik ondoriozta daitezkeen istripu arriskue-tarako eta erantzukizun zibilerako aseguruia izatea.

d) Euren jarduera duintasun, segurtasun eta higiene baldintza egokietan egitea, zereginen izaera eta ezaugarriak aintzat hartuta, betiere.

e) Zuzendaritzako kide direla erakusten duen egiaztagiria izatea.

f) Kirolaren esparruan egindako gizarte ekarpenarengatik errespetua eta ezagutza jasotzea.

g) Federazioaren zuzendaritza organoetan parte hartzeko behar duten informazioa eta doku-mentazioa eskura izatea.

h) Egozten zaizkien funtzioak behar bezala betetzeko behar dituzten baliabide materialak era iraunkorrean jasotzea.

i) Federazioaren estatutuetako edo arautegietako arauetan jasota dauden bestelako eskubi-deak.

44. artikulua

Arabako Gimnasia Federazioaren zuzendaritzako kideek honako betebeharrak hauek dituzte:

a) Euren betebeharrak gauzatzean jasotzen eta ezagutzen duten informazioaren gaineko konfidentzialtasuna gordetzea, hala dagokionean. Konfidentzialtasuna gordetzeko betebeharrak iraun egingo du kargua uzten dutenean ere.

- b) Funtzioak betetzean behar bezalako arduraz jokatzeari, betiere Federazioaren estatutuetako helburuen arabera.
- c) Federazioak eskura jartzen dizkien baliabide materialak errespetatzea eta zaintzea.
- d) Federazioarekin hartutako konpromisoak betetzea.
- e) Funtzioak behar bezala betetzeko antolatzen diren prestakuntza jardueretan parte hartzea.
- f) Urtarrilaren 31ko 16/2006 Dekretuan debekatuta dauden ordain ekonomikoei uko egitea, edozein eratakoak direla ere.
- g) Funtzioak betetzen jarraitzea, harik eta ondorengoek kargua hartzen duten arte, ezinbestean utzi behar izatekotan salbu.
- h) Organo eskudunek onartzen dituzten erabaki eta ebazpenei men egitea.
- i) Kargua uzten duten zuzendaritzako kideen ordeztasunari behar duten dokumentazio eta informazio guztia eskura jartzea.
- j) Euren interes pertsonalekin zerikusia duten gaiak erabakitzeko eztabaidetan parte ez hartzea. Interes pertsonala egongo da, baldin eta gaiak zuzendaritzako kidearen ezkontideari edota antzeko afektibitate harremana duten pertsonen, haren ondorengoei edo aurrekoei eragiten badie, edota zuzendaritzako kargua nahiz neurri bateko partaidetza duen sozietate bati eragiten badiot.
- k) Kide den organoen bileretara joatea, eta parte hartze aktiboa izatea eztabaidetan, bere irizpideak erabaki egokiak hartzen lagun dezan.
- l) Ematen zaion egiaztagiria behar bezala erabiltzea.
- m) Federazioak onartzen duen kode etikoa betetzea, halakorik onartzen bada.
- n) Federazioaren estatutuetako edo arautegietako arauetan jasota dauden bestelako betebeharrak.

45. artikulua

1. Kirol Federazioko lehendakari kargua bateraezina izango da beste kirol federazio bateko lehendakari karguarekin, beste kirol modalitate bateko federazioa izan arren.
2. Kirol Federazioko lehendakari kargua bateraezina da Federazioaren baitako kirol klub edo elkarte bateko lehendakari edo Batzar Nagusirako ordezkari karguarekin. Federazioko lehendakariak Batzarrean kirol klub edo elkarte baten ordezkari gisa hartzen bada parte, edo haren ordezkari gisa joan bada, lehendakari izan gabe ere, uko egin beharko dio kirol klub edo elkarreko lehendakari edo ordezkari karguari.
3. Kirol Federazioko lehendakari kargua bateraezina izango da Foru Administrazioaren edota Euskal Autonomia Erkidegoko Administrazio Orokorren baitan federazioei zuzenean lotuta dauden kargu edo lanpostu publikoekin.
4. Kirol Federazioko zuzendaritza kargua bateraezina da erakunde beraren kontseilari edo aholkulari profesional izatearekin. Halaber, Kirol Federazioko zuzendaritza kargua bateraezina da kirol erakunde berean zerbitzu profesionalak egitearekin harreman laboral, zibil edo merkantilaren bidez.

46. artikulua

Arabako Gimnasia Federazioaren zuzendaritzako kideek debekatuta dituzte honako hauek:

- a) Kargua utzarazi edo dimisioa aurkeztu eta gero kalte ordainak jasotzea.
- b) Hirugarren pertsonengandik edo entitateengandik komisioak edo antzeko mozkinak jasotzea, kirol entitateak ondasunak edo zerbitzuak kontratatzearen truke.

- c) Kirol helburuak edo helburu ekonomikoak lortzeagatik pizgarriak jasotzea.
- d) Bere enpresen bitartez edo hirugarren pertsonen edo entitateen bitartez Kirol Federazioarekin kontratuak egitea. Autokontratatzeko debekuak ezkontideen, antzeko afektibitate harremanaz lotutako pertsonen eta ondorengoen nahiz aurrekoen enpresei ere eragiten die.
- e) Kirol Federazioaren ondarea erabiltzea edo Federazioaren barruan duen postua baliatzea ondare abantailak lortzeko.

IV.TITULUA FEDERAZIOAREN ESTAMENTUAK

47. artikulua

Arabako Gimnasia Federazioaren estamentuetako kideek honako eskubide hauek izango dituzte, gutxienez:

- a) Federazioaren organoetan ordezkaritza izatea eta haietako kide izatea, estatutu hauen eta aplikatzeko araudiaren arabera ezarritako eran, baldintzetan eta proportzioan.
- b) Federazioak antolatutako jarduera guztietan parte hartzea, Federazioak horren gainean ematen dituen arauen arabera.
- c) Eskatzen duten informazioa jasotzea eta Federazioarekin zerikusia duten gaien inguruko irizpideak eta iritziak libreki adieraztea, kirola hobeto gara dadin.
- d) Federazioaren organo eskudunetara jotzea, Federazioaren arauak bete daitezela eskatzeko.
- e) Egoki iruditzen zaizkien kontsultak eta erreklamazioak egitea, Federazioaren arauekin bat etorritik.
- f) Federazio lizentziaren agiria izatea.

48. artikulua

Arabako Gimnasia Federazioaren estamentuetako kideek honako betebeharrak hauek izango dituzte:

- a) Ezarritako kuotak ordaintzea.
- b) Federazioaren organoetan era balioudunean onartutako erabakiak betetzea, horretarako eskumena duen organoak baliogabetzen edo bertan behera uzten ez dituen bitartean.
- c) Federazioaren helburuak lortzen era aktiboan parte hartzea.
- d) Ditutzen karguei atxikitako betebeharrak leialki betetzea, kargurik izanez gero.
- e) Arabako edo Euskadiko selekzioek kirol lehiaketetan parte hartzeko edo horiek prestatzeko egiten dituzten deialdietara joatea.

49. artikulua

Estatutu hauen helburuetarako, kirol klubak edo elkarteak dira Euskadiko Kirolaren ekainaren 11ko 14/1998 Legeko III. Tituluan aurreikusitakoari jarraiki eratutako elkarteak.

50. artikulua

Klubek eta elkarteek, Arabako Gimnasia Federazioak antolatutako edo baimendutako lehiaketak ofizialetan parte hartzeko, dagokien lizentzia izan behar dute.

51. artikulua

Arabako Gimnasia Federazioko kirolari dira kirolarien estamentuari dagokion federazio lizentzia duten pertsona fisikoak.

52. artikulua

1. Arabako Gimnasia Federazioko teknikari dira Federazioak edo indarrean dagoen legediak eskatzen duten titulazioa izanik estamentu horretako federazio lizentzia duten pertsonak.

2. Teknikoak, hala badagokie, Federazioko teknikarien elkargoan bilduko dira.

53. artikulua

1. Arabako Gimnasia Federazioko epaileak dira erakunde eskudunak emandako beharrezko titulazioa eta dagokien federazio lizentzia duten pertsona fisikoak.

2. Epaileak, hala badagokie, Federazioko epaileen elkargoan bilduko dira.

**V. TITULUA
DIZIPLINA ARAUBIDEA****54. artikulua**

Arabako Gimnasia Federazioaren kirol diziplinako araubidea ondoan aipatzen diren arauetara jarriki gobernatuko da: ekainaren 11ko 14/1998 Legeko X. tituluaren jasota dagoena, urtarrilaren 10eko 7/1989 Dekretua edo hori ordezkatzeko duen xedapena, Estatutu hauek eta Federazioaren Kirol Diziplinako Araudia.

55. artikulua

1. Arabako Gimnasia Federazioak bere egitura organikoko kide diren pertsonen gainean eta Federazioko kide diren pertsona fisiko edo juridikoen gainean baino ez du izango diziiplina ahalmena.

2. Federazioak ezin izango du diziiplina ahalmena erabili kirol modalitate bereko beste lurralde eremuetako federazioetako kideen kasuan, kirol jarduera Arabako Lurralde Historikoan badute ere.

56. artikulua

Diziiplina Batzordea Arabako Gimnasia Federazioaren organo eskuduna da, Federazioaren beste organoetatik aparte kirol diziplinarako ahalmena erabiltzen duena.

57. artikulua

1. Diziiplina Batzordeak kide bakarra edukiko du: diziiplina epailea, Zuzendaritza Batzordeak izendatua.

2. Diziiplina epailea lau urterako izango da izendatua, lehendakaritza-aldi bakoitzaren hasieran. Bere borondatez kargua uzten badu, Zuzendaritza Batzordeak beste diziiplina epaile bat izendatu ahal izango du agintaldia amaitu bitarteko.

Karguan aritzeko behar adinako ezagutza eduki behar du epaileak.

3. Zuzendaritza Batzordeko kideek ezingo dituzte diziiplina epailearen funtzioak bete.

4. Agintaldian zehar diziiplina epailearen izendapena atzera bota dezake Federazioaren Batzarrak.

58. artikulua

Diziiplina epaileak hartzen dituen erabakiak inpugnatu egin daitezke Euskadiko Gimnasia Federazioaren Apelazio Batzordearen aurrean.

VI. TITULUA

HAUTESKUNDE ARAUBIDEA

59. artikulua

Arabako Gimnasia Federazioaren hauteskunde araubidea honako hauei jarraiki gobernatuko da: urtarrilaren 31ko 16/2006 Dekretuaren VII. Titulua, horren garapeneko xedapenak, estatutu hauek eta Federazioaren Batzar Nagusiak onetsi beharko duen hauteskunde arautegia.

60. artikulua

Federazioaren Batzar Nagusia aukeratzeko hautesleria osatuko dute Federazioaren estamentu guzti-guztietako lizentzien titularrak, dagokion hauteskunde arautegian zehazten diren baldintzetan.

Hautesle eta hautagai izaera Euskadiko Kirol Federazioen Dekretuan, Estatutu hauetan eta Federazio honetako Hauteskunde Arautegian ezarritakora lotuko da.

61. artikulua

Federazioak Hauteskunde Batzorde bat izango du hauteskunde prozesua bultzatzeko eta behar bezala gauza dadin bermatzeko. Hiru kidez osatuko da; horietako bat lehendakaria izango da, eta beste bat idazkaria. Kargu horiek Batzordeko kideen artean hautatuko dira, eta izendapenik egiten ez bada, zaharrena izango da lehendakaria eta gazteena idazkaria.

62. artikulua

Hauteskunde Batzordearen eginkizunak lau urterako izango dira, nahiz eta Batzar Nagusiak ahalmena izango duen aldi hori amaitu aurretik Batzordea desegin eta beste bat izendatzeko.

63. artikulua

1. Hauteskunde Batzordeko kideak, eta horien ordezkioak, Batzar Nagusian hautatuko dira, hauteskunde prozesua hasi aurreko azkeneko ohiko batzarrean, edo, inor aurkezten ez bada, hautagai izango ez direnen arteko zozketa publikoaren bidez.

2. Hautagai gisa aurkeztera doazenak ezingo dira inola ere Hauteskunde Batzordeko kide izan; izendatutako Hauteskunde Batzordeko kideren bat egoera horretan balego, kargua utzi beharko du eta izendatzen den ordezkioak hartu beharko du beraren lekua.

64. artikulua

1. Hauteskunde Batzordeak honako funtzio hauek izango ditu:

a) Hautesleen errolda eta hauteskunde egutegia onartzea.

b) Aurkezten diren hautagaitzak aldarrikatzea eta argitara ematea.

c) Hauteskunde Mahaia izendatzea.

d) Batzar Nagusiko kideen kopuru zehatza finkatzea, hauteskunde erroldari erreparatuta, Estatutu hauetako 16.2 puntuarekin eta Hauteskunde Arautegiak ezartzen dituen irizpideekin bat etorritik, halakorik ezartzen badu.

e) Hautetsiak zein diren aldarrikatzea.

f) Aurkezten diren inpugnazioak, erreklamazioak eta eskaerak ebaztea, bai eta Hauteskunde Mahaiaren erabakien aurka jartzen diren errekursoak ere.

g) Hauteskundeak egiteari eta hauteskundeetako emaitzei zuzenean eragiten dien edozein gai.

2. Hauteskunde Batzordeak hartzen dituen erabakiak Kirol Justiziako Euskadiko Batzordearen aurrean inpugnatu ahal izango dira.

65. artikulua

Hauteskunde Batzordeak, hautagai izan behar ez duten hautesleen artean zozketa eginda, Hauteskunde Mahaia izendatuko du. Mahaia hiru pertsonak osatuko dute eta hiru ordezkari egongo dira. Haietako bat lehendakaria izango da, eta beste bat idazkaria, Mahaiko kideen artean hautatuta. Izendapenik egiten ez bada, zaharrena izango da lehendakaria eta gazteena idazkaria.

66. artikulua

1. Hauteskunde Mahaiak honako funtzio hauek izango ditu:

- a) Bozketak behar bezala egin daitezen bermatzea.
- b) Bozkatzen duten pertsonen identitatea eta hautesle izaera egiaztatzea.
- c) Ematen diren botoak baliozkoak diren erabakitzea.
- d) Behin bozkatutakoan, botoak zenbatzea.
- e) Bozketari dagokion beste edozein gairi buruz erabakitzea.

2. Hauteskunde Mahaiaren erabakiak Hauteskunde Batzordearen aurrean inpugnatu ahal izango dira.

**VII. TITULUA
EKONOMIA ETA ONDARE ARAUBIDEA****67. artikulua**

1. Arabako Gimnasia Federazioak berezko aurrekontu eta ondare erregimena ditu.

2. Kirol Federazioaren ondarea osatzen dute Federazioak titular gisa dituen ondasun guztiak.

3. Federazioak honako baliabide hauek ditu:

- a) Federatuen kuotak.
- b) Erakunde publikoek edo pribatuek emandako dirulaguntzak.
- c) Dohaintzak, herentziak, legatuak eta sariak.
- d) Antolatzen diren kirol jardueretan eta lehiaketetan ateratako mozkinak.
- e) Egiten dituen industria, merkataritza, lanbide edo zerbitzu jardueretatik ateratako mozkinak.
- f) Euren ondarearen fruituak eta ondarea besterentzetik edo zergapetzetik ateratzen dena, urtarilaren 31ko 16/2006 Dekretuaren 138. artikuluan ezarritako baldintzetan.
- g) Lortzen dituzten maileguak edo kredituak.
- h) Euren jarduera egitean lor dezakeen beste edozein.

68. artikulua

1. Federazioaren diru sarrera guztiak, kirol jardueretan lortutako mozkinak eta sariak nahiz industria, merkataritza, lanbide edo zerbitzu izaerako jardueretatik atera ditzakeenak, Federazioaren xedea garatzeko erabiliko dira oso-osorik.

2. Mozkinak ezin izango dira inola ere Federazioko kideen artean banatu.

69. artikulua

Arabako Gimnasia Federazioak ondasun higiezinak besterendu edo zergapetu egin ditzake, dirua har dezake maileguan eta zorraren edo ondare parte alikuotaren titulu ordezkatzailerak jaulki ditzake, urtarilaren 31ko 16/2006 Dekretuaren 138. eta 139. artikuluetan ezarritako kasuetan eta baldintzetan.

70. artikulua

Arabako Gimnasia Federazioak goi zuzendaritzako lan kontratuak izenpetu ahal izango ditu, baldin eta erabakia eta ordainsaria zein kontratuko bestelako baldintzak gehiengo osoz onartzen badira Batzar Nagusian, eta baldin eta Arabako Foru Aldundiko organo eskudunak baimena ematen badu.

71. artikulua

1. Arabako Gimnasia Federazioak urtero onartuko du ekitaldiko aurrekontua eta likidazioa.
2. Zuzendaritza Batzordearen ardura da urtero aurrekontuen proiektua egitea, eta Batzar Nagusiari dagokio onartzea.
3. Aurrekontuan Federazioak gehienez onar ditzakeen betebeharrak adierazi beharko dira (zifraz horniturik, era bateratuan eta sistematikoki), bai eta ekitaldian zehar likidatzea aurreikusita dagoen eskubideak ere. Era berean, Arabako Gimnasia Federazioaren aurrekontuan jasota egon behar dute kirol modalitate horretan emakumeen eta gizonen arteko berdintasuna sustatzeko betebeharrak.
4. Aurrekontu bakarra egongo da, eta Federazioaren gastu eta diru sarrera guztiak sartuta edukiko ditu, organo osagarrienak eta horien laguntzarako entitateenak barne. Kudeaketa edo antolamendu beharrek hala eskatzen dutenetan, Arabako Gimnasia Federazioak kontabilitateko azpierakundeak sortu ahal izango ditu, sistema zentrolean behar bezala integratuta egongo direnak.
5. Aurrekontua orekatua izango da, eta inolaz ere ezingo da onartu defizita sortzen duen aurrekonturik aldeztetik Arabako Foru Aldundiko organo eskudunaren baimena eskuratu gabe.
6. Behin Batzar Nagusiaren onarpena lortutakoan, ekitaldiko aurrekontua eta aurreko urteko aurrekontuaren likidazioa Arabako Foru Aldundiko organo eskudunari helaraziko zaizkio.
7. Federazioaren Zuzendaritza Batzordeak aurrekontua aldatu ahal izango du, betiere aldaketa gastuen aurrekontu osoaren ehuneko 20 baino gehiagokoa ez denean.
8. Guztizko aurrekontuaren ehuneko 20 gaingiditzen duten programa arteko kreditu transferentziarako, Arabako Foru Aldundiaren baimena behar izango da.

72. artikulua

1. Ekitaldi bakoitza itxi eta hiru hilabete igaro baino lehenago, Arabako Gimnasia Federazioaren Zuzendaritza Batzordeak Batzar Nagusiari aurkeztuko dizkio urteko kontuak, honako hauek barnean dituztela: balantzea, galera-irabazien kontua eta memoria ekonomikoa.
2. Zuzendaritza Batzordeak aurkeztu dituen urteko kontuak lehendakariak eta diruzainak izenpetuta egongo dira.
3. Federazioaren urteko kontuen egitura bat etorriko da Kirol Federazioetara egokitutako Kontabilitate Plan Orokorren arauekin.

73. artikulua

Arabako Gimnasia Federazioak onartu egin beharko du finantza eta kudeaketa auditoretza, eskuduna den Administrazioak hala eskatzen duenean, dagozkion kasu eta ekitaldietan.

**VIII. TITULUA
AGIRI ARAUBIDEA****74. artikulua**

Arabako Gimnasia Federazioak liburu hauek izango ditu, nahitaez:

- a) Federazioaren estamentuen liburua, estamentu bakoitzari dagozkion ataletan banatuta. Estamentuetako zerrendak eguneratuta egongo dira, eta alta eta baja egunak jasota.

b) Federazioaren akta liburua; bertan jasota egongo dira Batzar Nagusiak, Zuzendaritza Batzarrak eta Federazioaren gainerako organoek hartzen dituzten erabakiak.

c) Kontabilitate liburua.

d) Halakorik izatera, zorraren edo ondare parte alikuotaren tituluen erregistro liburua.

e) Gatazkak epaitegietatik kanpora ebazteko araubidearen mende egotetik salbuestearen erregistro liburua.

Euskadiko Kirol Erakundearen Erregistroak aurreikusitakoaren arabera bideratuko dira liburu horiek.

IX. TITULUA FEDERAZIOA DESEGITEA ETA LIKIDATZEA

75. artikulua

1. Arabako Gimnasia Federazioa desegin egingo da:

a) Aparteko Batzar Nagusiak hala erabakitzen duenean, bildutakoen bi herenen gehiengoaz.

b) Horretarako erabaki judiziala ematen denean.

2. Arabako Gimnasia Federazioa desegin egin behar da honako hauetakoren bat gertatuz gero:

a) Federazioaren onarpen ofiziala baliogabetzea.

b) Administrazio izaerako funtzio publikoak behar bezala betetzeko ageriko ezintasuna izatea.

c) Federazioaren organoak gelditzea, eta, ondorioz, funtzionamendua ezinezkoa izatea.

d) Egotzi zaizkion funtzio publikoak ez betetzea.

e) Beste kirol federazio batekin bat egitea.

f) Beste kirol federazio batean sartzea.

g) Indarrean diren legeetan aurreikusita dagoen beste edozein arrazoi dela medio.

76. artikulua

1. Federazioko lehendakariak Batzar Nagusirako deialdia egingo du, desegiteko erabakia har dezan. Erabakia bi hilabeteko epean hartu behar du Batzarrak, desegiteko kausaren berri izaten duen unetik kontatzen hasita.

2. Pertsona federatuek eta Arabako Foru Aldundiko organo eskudunak ere eska diezaioke lehendakariari Batzar Nagusirako deialdia egitea, baldin eta, haien ustez, aurreko artikuluan zehaztuta dauden kausetako bat gertatzen bada.

3. Batzar Nagusirako deialdirik egiten ez bada, desegiteko erabakia hartzerik ez bada, edo ez desegitea erabakitzen bada, edozein federatuk edo Arabako Foru Aldundiak berak eskatu ahal izango du Federazioaren desegite judiziala.

4. Federazioaren Zuzendaritza Batzordea bera behartuta dago desegite judiziala eskatzera, Federazioaren erabakia desegitearen aurkakoa baldin bada, edo ezin bada desegiteko erabakia lortu.

77. artikulua

Federazioa desegindakoan, likidatzeko aldia hasten da, bategiteak edo desegiten den federazioaren aktiboen eta pasiboen lagapen globala gertatzen denetan izan ezik.

78. artikulua

Arabako Gimnasia Federazioak, desegin eta gero, nortasun juridikoa gordetzen du likidatzen ari den bitartean. Aldi horretan «likidatzen» hitza gehitu beharko dio bere izenari.

79. artikulua

Federazioak likidatzen ari dela adierazten duen unean, Zuzendaritza Batzordeak bere funtzioak bertan behera utziko ditu, eta likidatzaileek hartuko dituzte euren gain funtzioak. Hala ere, Zuzendaritza Batzordeko kideek parte hartu beharko dute likidazio eragiketak gauzatzen.

80. artikulua

1. Batzar Nagusiari dagokio likidatzaileak izendatzea. Likidatzaileen kopurua beti bakoitia izango da.

2. Likidatzaileen izendapena eta kargu uztea Kirol Erakundeen Euskadiko Erregistroan inskribatu beharko da.

81. artikulua

Honako hauek dira Federazioaren likidatzaileen funtzioak:

a) Euren funtzioetan hastean Federazioak duen hasierako balantzea izenpetzea, administrazio organoarekin batera.

b) Federazioko liburuez eta korrespondentziaz arduratzea eta horiek zaintzea, bai eta Federazioaren ondarearen osotasuna bermatzea ere.

c) Federazioa likidatzeko egiteke dauden eragiketak nahiz behar diren eragiketa berriak gauzatzea.

d) Federazioaren ondasunak eta eskubideak besterentzea. Ondasun higiezinak enkante publikoan salduko dira nahitaez. Arabako Foru Aldundiak baimentzen duen kasuetan baino ezin izango dira zuzenean saldu.

e) Transakzioak eta arbitrajeak hitzartzea, Federazioaren interesei hala komeni zaienean.

f) Hartzekodunei ordaintzea.

g) Federazioaren ordezkari izatea.

82. artikulua

Likidazioa amaitutakoan, likidatzaileek azken balantzea egingo dute. Balantzea Batzar Nagusiari aurkeztuko zaio, onetsi dezan; gero, Arabako Foru Aldundira bidaliko da.

83. artikulua

Honako hauek dira likidatzaileen jardura amaitzeko arrazoiak:

a) Likidazioa burutzea.

b) Batzar Nagusiak emandako ahalordeak baliogabetzea.

c) Arabako Foru Aldundiak ahalordeak baliogabetzea edo gaitasunik gabe uztea.

d) Erabaki judiziala.

84. artikulua

Baldin eta Federazioak ez badu kaudimenik, likidatzaileek berehala eskatu behar dute dagokion lehiaketa adierazpena.

85. artikulua

Batzorde likidatzaileak Federazioaren desegitea Euskadiko Kirol Erakundeen Erregistroari jakinaraziko dio, inskripzioan deuseztatu dezan.

X. TITULUA ESTATUTUAK ETA ARAUDIAK

86. artikulua

Arabako Gimnasia Federazioaren estatutuak aparteko Batzar Nagusiak bakarrik aldatu ahal izango ditu, bildutakoen 2/3en gehiengoaz hartutako erabakiaren bidez.

87. artikulua

Behin estatutuen proiektua onetsi ondoren, Batzar Nagusiaren erabakitik kontatzen hasi eta hirurogei egun naturaleko epean, Arabako Foru Aldundiari aurkeztuko zaio, onetsi dezan.

88. artikulua

Estatutuak Euskal Autonomia Erkidegoan ofizialak diren bi hizkuntzetan aurkeztu beharko dira, eta Euskadiko Kirol Erakundearen Erregistroak eskatzen duen euskarri informatikoan.

89. artikulua

Federazioaren estatutuak indarrean sartzeko, administrazio onespenera jaso beharko dute, eta ALHAOn argitaratu beharko dira.

90. artikulua

Arabako Gimnasia Federazioak ondorengo hauek arautu beharko ditu gutxienez:

- a) Lehiaketa ofizialak antolatze eta garatzeko araubidea.
- b) Diziplina araubidea.
- c) Hauteskunde araubidea.
- d) Gatazkak epaitegietatik kanpora ebazteko araubidea.

91. artikulua

Arabako Gimnasia Federazioaren araudiak onar ditzan aurkeztuko zaizkio Arabako Foru Aldundiko organo eskudunari, hirurogei egun naturaleko epean Federazioaren Batzar Nagusian onartzen diren unetik kontatzen hasita.

92. artikulua

Araudiak onartu eta aldatu ahal izateko, horretarako deitutako aparteko Batzar Nagusira joaten diren kideen gehiengoak aldeko botoa eman beharko du.

93. artikulua

1. Federazioaren zirkularrak estatutuen eta arautegien indarraldia, aplikazioa, interpretazioa nahiz Federazioari dagozkion bestelako gaiak ezagutarazteko erabiliko dira, baina ez dute arau izaerarik izango.

2. Federazioaren zirkularrek ez dute alde aurretik administrazio onespenerik behar.

94. artikulua

1. Autonomia Erkidegoena baino lurralde eremu zabalagoko kirol federazioen estatutuak eta araudiak Federazio honi eta bere kideei aplikatu dakizkieke soilik baldin Arabako Federazio hau haietako kide bada, eta federazio horiek eskumena duten gaien inguruan baino ez. Kasu horietan, Arabako Gimnasia Federazioak arau horiek behar adina zabaldu beharko ditu, Federazioaren estamentu desberdinek behar bezala ezagut ditzaten. Arau horiek Federazio honen hizkuntza ofizialetakoren batean idatzita egon behar dute.

2. Autonomia Erkidegoena baino lurralde eremu zabalagoko kirol federazioen gainerako araudiak ez zaizkio zuzenean aplikatuko Arabako Gimnasia Federazioari eta horren kideei. Federazioaren araudian sartu ahal izateko, federazioaren eta administrazioaren onarpenera eta Euskadiko Kirol Erakundearen Erregistroko inskripzioa beharko dira.

3. Autonomia Erkidegoena baino lurralde eremu zabalagoko kirol federazioen araudiak ez dira era osagarrian aplikatzekoak izango Arabako Gimnasia Federazioan. Hala ere, arau horiek era osagarrian aplikatu ahal izango ditu, baldin eta bere araudietan berariaz hala ezartzen bada, behar bezala ezagutarazten badira eta Federazio honen hizkuntza ofizialetakoren batean idatzita badaude.

XI. TITULUA

HIZKUNTZA NORMALIZAZIOA

95. artikulua

Euskara eta gaztelania dira Arabako Gimnasia Federazioaren hizkuntza ofizialak.

96. artikulua

Arabako Gimnasia Federazioaren organoek Federazioaren baitan euskara normalizatzeko pixkanakako prozesua bermatuko dute, urtarrilaren 31ko 16/2006 Dekretuaren Hirugarren Xedapen Iragankorrean xedatutakoaren arabera.

97. artikulua

Arabako Gimnasia Federazioaren ziurtapenak Euskal Autonomia Erkidegoan ofizialak diren bi hizkuntzetan edo horietako batean egin ahal izango dira, interesdunak adierazten duen moduan.

XII. TITULUA

GATAZKAK EPAITEGIETATIK KANPORA EBAZTEA

98. artikulua

Federazioaren eta federatu edo kideen artean nahiz horien artean sor daitezkeen auziak edo diferentziak Zuzenbide Arbitrajearen bidez ebartziko dira, indarrean dagoen legedian, Estatutu hauetan eta garapen araudian ezarritako terminoetan.

99. artikulua

Arbitraje bidez ebazti daitezkeen auzi edo diferentziak edo, oro har, epaitegietatik kanpora ebazti daitezkeen gatazkak, Euskal Kirol Federazioen Batasunak sortutako Kirol Arbitrajerako Euskal Auzitegiaren pean jarriko dira.

100. artikulua

Bide horretatik ebartziko dira gai guztiak, hauek izan ezik: Administrazioak Federazioari eskuordetutako funtzio publikoen gauzatzearekin zerikusia dutenak eta legediak berariaz eta legez arbitrajetik kanpo uzten dituenak.

101. artikulua

Ulertzen da Estatutu hauetan eta horien garapenerako araudian aurreikusitako arbitraje sistemaren eta gatazkak epaitegietatik kanpora ebazteko sistemaren pean jartzen dela federatu edo Federazioko kide oro, nola-eta Estatutu hauek onesten diren datatik edo lizentzia eskuratzen duenetik kontatzen hasi eta hilabeteko epean berariaz horiei uko egiten ez dien.

XEDAPEN IRAGANKORRAK

Lehenengoa. Eusko Jaurlaritzak urtarrilaren 31ko 16/2006 Dekretuaren 25. artikuluan aurreikusitako lizentzien ezaugarri teknikoak onesten ez dituen bitartean, lizentziak Euskadiko dagokion Federazioak onartutako formatuan izapidetzen jarraitu ahal izango du Federazioak.

Bigarrena. Estatutu hauetako 36. artikuluan ezarritako agintaldi mugek ez dute eraginik izango estatutu hauek indarrean sartzean lehendik dauden karguetan, eta, ondorioz, kargu horiek beren egungo agintaldiak amaitu ahal izango dituzte. Estatutu etako aipatutako mugak hurrengo hauteskunde prozesuetarako bakarrik izango dira kargu horiei aplikatzekoak.

Hirugarrena. Estatutu hauek indarrean sartu eta gero, Federazioaren organoak berritzeko hauteskunderik ez da egingo Olinpiaden urtera arte, hau da, 2008 arte; bitartean, organoetako pertsonak eta osaera aurreko estatutuen arabera izango dira, jarraian bi hauteskunde prozesu egin beharra saihesteko.

XEDAPEN INDARGABETZAILEA

Indargabetuta geratzen dira Arabako Gimnasia Federazioaren estatutuak, estatutu hauek inskribatu eta argitaratu arte indarrean egon direnak.

AZKEN XEDAPENA

Estatutu hauek ALHAOn argitaratzen diren egunaren hurrengoan sartuko dira indarrean.